

R J E Š E N J E
po Zaključku o pokretanju postupka po službenoj dužnosti, protiv privrednih subjekata
„BHB Cable TV“ d.o.o. Lukavac i „ELTA-MT“ d.o.o. Tuzla

Sarajevo
Juli, 2012.godine

Broj: 02-26-6-018-63-II/11
Sarajevo, 31.07.2012. godine

Na osnovu člana 25. stav (1), tačka (e), člana 42. stav (1) tačka (a), i člana 54., a u vezi sa članom 4. stav (1) tačka c) Zakona o konkurenciji («Službeni glasnik BiH», br. 48/05, 76/07 i 80/09) i člana 108. Zakona o upravnom postupku („Službeni glasnik BiH“, br. 29/02, 12/04, 88/07 i 93/09), u postupku pokrenutom po Zaključku o pokretanju postupka po službenoj dužnosti, broj: 02-26-6-018-9-II/11 od dana 08.02.2012. godine, protiv privrednih subjekata „BHB Cable TV“ d.o.o. Lukavac, Dom kulture Lukavac, 75300 Lukavac i „ELTA-MT“ d.o.o. Tuzla, Fočanska 1 N, 75000 Tuzla, postupajući po Prijavi za oslobađanje od kazne podnesenoj od privrednog subjekta „BHB Cable TV“ d.o.o., radi utvrđivanja postojanja zabranjenog sporazuma, Konkurencijsko vijeće na 39. (tridesetdevetoj) sjednici održanoj dana 31.07.2012. godine, je donijelo

R J E Š E N J E

1. Utvrđuje se da privredni subjekt „BHB Cable TV“ d.o.o. Lukavac, Dom kulture Lukavac, 75300 Lukavac, i privredni subjekt „ELTA-MT“ d.o.o. Tuzla, Fočanska 1 N, 75000 Tuzla, zaključenim Ugovorom o zajedničkom upravljanju mrežom kablovske televizije u gradu Lukavcu (broj: 003/05 od dana 19.08.2005. godine) ne sprečavaju, narušavaju i ograničavaju konkurenciju u smislu podjele tržišta ili izvora snabdjevanja u oblasti pružanja usluga kablovske distribucije radio/televizijskog programa u gradu Lukavcu, iz člana 4. stav (1) tačka c) Zakona o konkurenciji.
2. Stavlja se van snage Odluka o uslovnom oslobađanju od kazne Konkurencijskog vijeća, broj: 02-26-6-18-03-II/11 od dana 29.09.2012. godine.
3. Konkurencijsko vijeće o Zahtjevu za nadoknadom troškova postupka za zastupanje privrednog subjekta „ELTA-MT“ d.o.o. Tuzla, Fočanska 1 N, 75000 Tuzla, će donijeti poseban zaključak, u smislu člana 108. stav (4) Zakona o upravnom postupku.
4. Ovo Rješenje je konačno i bit će objavljeno u „Službenom glasniku BiH“, Službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (dalje u tekstu: Konkurencijsko vijeće) je, dana 25.08.2011. godine pod brojem: 02-26-6-018-II/11, u skladu s članom 2. Odluke o proceduri oslobađanja odnosno ublažavanja od kazne („Službeni glasnik BiH“, broj 34/10) zaprimilo Prijavu za oslobađanje od kazne (dalje u tekstu: Prijava) zbog učestvovanja u zabranjenom sporazumu, podnesenu od privrednog subjekta „BHB Cable TV“ d.o.o. Lukavac, Dom kulture Lukavac, 75300 Lukavac (dalje u tekstu: BHB Cable).

U Prijavi je privredni subjekt BHB Cable naveo da je učestvovao u zabranjenom sporazumu, iz člana 4. stav (1) tačka c) Zakona o konkurenciji (dalje u tekstu: Zakon), jer je sa drugim kablovskim operaterom zaključio ugovor o upravljanju mrežom kablovske televizije kojim je predviđeno da se pretplatnici dijele po principu parni su pretplatnici jednog kablovskog operatera, a neparni pretplatnici drugog.

Nakon što je utvrđeno da su ispunjeni svi zakonom predviđeni uslovi, Konkurencijsko vijeće, je na 17. sjednici dana 29.09.2011. godine donijelo Odluku o uslovnom oslobađanju od kazne

broj: 02-26-6-018-3-II/11(dalje u tekstu: Odluka), kojom je privredni subjekt BHB Cable, uslovno oslobođen kazne za povredu člana 4. stav (1) Zakona.

Konkurencijsko vijeće je predmetnu Odluku dostavilo privrednom subjektu BHB Cable, te je, aktom broj: 02-26-6-018-4-II/11 od 29.09.2011. godine, zatražilo dostavljanje kompletne dokumentacije i podataka koja navode iz Prijave,. Budući da privredni subjekat BHB Cable nije dostavio traženu dokumentaciju, Konkurencijsko vijeće je aktom broj: 02-26-6-018-5-II/11 od 10.11.2011. godine.,ponovilo zahtjev za dokumentacijom.

Privredni subjekt BHB Cable je, podneskom broj: 02-26-6-018-6-II/11 od 14.12.2011. godine dostavio dio tražene dokumentacije, te je Konkurencijsko vijeće, aktom: 02-26-6-018-7-II/11 od 14.11.2011. godine, zatražilo dostavljanje dodatnih podataka.Privredni subjekt BHB Cable je dostavio traženu dokumentaciju podneskom broj: 26-6-018-8-II/11 od dana 21.12.2011. godine.

Privredni subjekt BHB Cable je u dostavljenoj dukumentaciji, u bitnom naveo:

- da je sa privrednim subjektom „ELTA-MT“ d.o.o. Tuzla, Fočanska 1N, 75000 Tuzla (dalje u tekstu: ELTA-MT) izgradio zajedničku mrežu kablovske televizije u gradu Lukavcu;
- da je sa privrednim subjekatom ELTA-MT zaključio Ugovor o zajedničkom upravljanju mrežom kablovske televizije u Lukavcu, broj: 003/05 od dana 19.08.2005. godine , (dalje u tekstu: Ugovor o zajedničkom upravljanju) ;
- da su Ugovorom o zajedničkom upravljanju podijelili pretplatnike po principu parni pretplatnici pripadaju jednoj strani, a neparni pretplatnici drugoj strani.

Konkurencijsko vijeće je nakon provedenih aktivnosti prikupljanja dokumentacije i podataka u vezi djelovanja ova dva privrednog subjekta na tržištu pružanja usluga kablovske distribucije televizijskog programa u gradu Lukavcu, te analizom Ugovora o zajedničkom upravljanju, ocijenilo da postoji osnovana sumnja da pojedine odredbe istoga, spriječavaju, ograničavaju ili narušavaju tržišnu konkurenciju, u smislu člana 4. stav (1) tačka c) Zakona.

1. Stranke u postupku

Stranke u postupku su: privredni subjekt „BHB Cable TV“ d.o.o. Lukavac, Dom kulture Lukavac, 75300 Lukavac, i privredni subjekt „ELTA-MT“ d.o.o. Tuzla, Fočanska 1 N, 75000 Tuzla.

1.1. Privredni subjekt BHB Cable

Privredni subjekat „BHB Cable TV“ d.o.o. Lukavac, Dom kulture Lukavac, 75300 Lukavac, upisan u sudski registar kod Općinskog suda u Tuzli pod matičnim brojem: 1-13276, sa upisanim kapitalom u iznosu od 389.529,00 KM, sa 56,0% vlasničkih udjela fizičkog lica Jurić Drago, ¹(..)**, sa 32,0% vlasničkih udjela fizičkog lica Tomičević Branko, (..)** i 12,0% vlasničkih udjela fizičkog lica Lučić Ilija, (..)**.

Pretežne registrovane djelatnosti privrednog subjekta BHB Cable su emitovanje televizijskog programa i druge aktivnosti iz okvira registrovane djelatnosti.

¹(..)** podaci predstavljaju poslovnu tajnu

Privredni subjekt BHB Cable je u 2010. godini ostvario ukupni godišnji prihod od ²(..)** KM, a u 2011. godini prihod od (..)**KM.

Privredni subjekt BHB Cable posjeduje važeću Opštu dozvolu za javnog mrežnog operatera, broj: DMOR-TS/076/04, izdatu od strane Regulatorne agencije za komunikaciju (dalje u tekstu: RAK) dana 28.12.2004. godine.

Na području Bosne i Hercegovine privredni subjekt BHB Cable nema povezanih društava, niti udjela u drugim privrednim subjektima.

1.2. Privredni subjekt ELTA-MT

Privredni subjekat „ELTA-MT“ d.o.o. Tuzla, Fočanska 1 N, 75000 Tuzla, upisan u sudski registar kod Općinskog suda u Tuzli pod matičnim brojem 1-12616, sa upisanim kapitalom u iznosu od 2.000,00 KM, sa 100,0% vlasničkih udjela fizičkog lica Tokača Muhamed, (..)**.

Pretežne registrovane djelatnosti privrednog subjekata ELTA-MT su emitovanje televizijskog programa i druge aktivnosti iz okvira registrovane djelatnost.

Ukupan prihod privrednog subjekata ELTA-MT u 2010. godini iznosi (..)** KM, a u 2011. godini (..)** KM.

Privredni subjekt ELTA-MT posjeduje važeću dozvolu, broj: 337-DP, za distribuciju RTV programa, izdatu od strane RAK-a dana 17.01.2011. godine.

Na području Bosne i Hercegovine privredni subjekat ELTA-MT nema povezanih društava, niti vlasničkih udjela u drugim privrednim subjektima.

2. Pravni okvir predmetnog postupka

Konkurencijsko vijeće u postupku je primijenilo odredbe Zakona, Odluku o utvrđivanju relevantnog tržišta („Službeni glasnik BiH”, br. 18/06 i 30/10), Odluku o proceduri oslobađanja odnosno ublažavanja od kazne („Službeni glasnik BiH”, br. 34/10), Odluka o definisanju kategorija dominantnog položaja („Službeni glasnik BiH“, br.18/06 i 34/10), kao i odredbe Zakona o upravnom postupku („Službeni glasnik BiH“, br. 29/02, 12/04, 88/07 i 93/09), u smislu člana 26. Zakona.

Konkurencijsko vijeće je takođe primjenilo i odredbe Zakona o komunikacijama („Službeni glasnik BiH“ broj 31/03, 75/06 i 32/10).

3. Postupak po Zaključku o pokretanju postupka po službenoj dužnosti

Konkurencijsko vijeće je dana 08.02.2012. godine, na osnovu člana 32. stav (1) Zakona, donijelo Zaključak o pokretanju postupka po službenoj dužnosti, broj: 02-26-6-018-9-II/11 (u daljem tekstu: Zaključak) protiv privrednog subjekta ELTA-MT i privrednog subjekta BHB Cable, radi utvrđivanja postojanja zabranjenog sporazuma, iz člana 4. stav (1) tačka c) Zakona.

U skladu sa članom 33. stav (1) Zakona, Konkurencijsko vijeće je dostavilo strankama u postupku predmetni Zaključak na odgovor, te dana 09.02.2011. godine zatražilo dostavu relevantne dokumentacije, aktom broj: 02-26-6-018-13-II/11 i broj: 02-26-6-018-14-II/1.

²(..)** podaci predstavljaju poslovnu tajnu

Privredni subjekt BHB Cable, je putem svog punomoćnika, Advokatske kancelarije Spaho, Mehmeda Spahe 8, 71000 Sarajevo (dalje u tekstu: punomoćnik BHB Cable) dana 20.02.2012. godine podneskom broj: 02-26-6-018-15-II/11, Konkurencijskom vijeću dostavio izjašnjenje na Zaključak, u kojem navodi slijedeće:

- Da, kao i privredni subjekat ELTA-MT, posjeduje Opštu dozvolu za javnog mrežnog operatera za grad Lukavac, i da su ova dva operatera jedini pružaoci usluga kablovske TV na području grada Lukavca;
- da su privredni subjekat BHB Cable i privredni subjekat ELTA-MT sklopili Ugovor o zajedničkom upravljanju mrežom kablovske TV u gradu Lukavcu kojim su podijelili pretplatnike po principu da pretplatnik sa parnim brojem ugovora bude pretplatnik privrednog subjekta ELTA-MT-a, a pretplatnik sa neparnim brojem bude pretplatnik privrednog subjekta BHB Cable;
- da u vrijeme sklapanja Ugovora o zajedničkom upravljanju nije bio upoznat sa činjenicom da je isti u suprotnosti s odredbama Zakona;
- da privredni subjekt ELTA-MT nije pratio tempo razvoj mreže kablovske televizije, te da je poduzimao radnje usmjerene protiv privrednog subjekta BHB Cable;
- da je po saznanju da je Ugovor o zajedničkom upravljanju u suprotnosti sa Zakonom, obustavio sva djelovanja, te pokrenuo proceduru pred Konkurencijskim vijećem i da će u potpunosti saradivati s Konkurencijskim vijećem tokom ovoga postupka.

Privredni subjekt ELTA-MT putem svog punomoćnika, advokata Mirze Telalovića, Maršala Tita 36, 75000 Tuzla (dalje u tekstu: punomoćnik ELTA-MT) dostavio traženo izjašnjenje i dokumentaciju, dana 27.02.2012. godine podneskom broj: 02-26-6-018-18-II/11, kojem u potpunosti osporava Zaključak, te navodi slijedeće:

- da nema osnova za pokretanje postupka radi utvrđivanja postojanja zabranjenog sporazuma iz člana 4. stav (1) tačka c) Zakona, jer prema odredbama Ugovora o zajedničkom upravljanju, nema nikakve podjele tržišta niti izvora snabdijevanja, budući da potpisnici istoga imaju istu mrežu, istu dozvolu i pružaju jednu uslugu, odnosno vrše distribuciju istih programa u zajedničkom sistemu kablovske televizije;
- da predmetni Ugovor o zajedničkom upravljanju predstavlja Ortački ugovor, te da unutar njihove zajedničke mreže nema konkurencije, jer svaki pretplatnik prima signal iz jedne centrale i prati istu šemu televizijskih programa iz jedne jedinstvene mreže, bez obzira da li je pretplatnik privrednog subjekta ELTA-MT ili privrednog subjekta BHB Cable;
- da Zakon o komunikacijama ne zabranjuje da umjesto jednog nosioca djelatnosti, budu dva ili više;
- da je mreža kablovske televizije u gradu Lukavcu izgrađena 2002. godine, zajedničkim ulaganjem privrednog subjekta ELTA-MT i privrednog subjekta „Telefon komerc“ d.o.o. Tuzla, pri čemu su odobrenje za građenje i upotrebna dozvola izdati na oba investitora;
- da je privredni subjekt „Telefon komerc“ d.o.o. Tuzla svojih 50,0% vlasničkih udjela u mreži kablovske televizije u gradu Lukavcu, prenio na privredni subjekat BHB Cable (Ugovorom od dana 15.12.2004. godine);
- da je cijena pretplate na kablovsku televiziju u gradu Lukavcu niža nego u drugim gradovima Bosne i Hercegovine, te da se u tome ogleda prednost i korist ovog ortačkog ugovora za krajnje potrošače;

- da pitanje (ne)postojanja konkurencije može postaviti samo neki treći kablovski operater;
- da u gradu Lukavcu postoje i funkcionišu još tri mreže: BH Telecom mreža, odnosno „Moja TV“, zatim bežična kablovska - MMDS mreža (Multichannel Multipoint Distribution System) privrednog subjekta Elta-kabel d.o.o. Doboj, te DTH (direct-to-home) satelitska mreža - Total TV, koje predstavljaju stvarnu konkurenciju predmetnoj ortačkoj mreži;
- da se pred Općinskim sudom u Tuzli vodi 42 privredna spora protiv privrednog subjekta BHB Cable, radi duga prema privrednom subjektu ELTA-MT nastalog radi nepoštivanja predmetnog Ugovora o zajedničkom upravljanju;
- da privredni subjekt BHB Cable nastoji Ugovor o zajedničkom upravljanju predstaviti da je u suprotnosti sa Zakonom, da bi ortaka izbacio s relevantnog tržišta, te istovremeno izbjegao plaćanje nastalog duga;
- da je privredni subjekt BHB Cable pokrenuo tužbu protiv privrednog subjekta ELTA-MT za raskid Ugovora o zajedničkom upravljanju.

Privredni subjekt ELTA-MT je dostavio dopunu odgovora na Zaključak, podneskom broj: 02-26-6-018-19-II/11 od dana 27.02.2012. godine, u kome navodi sljedeće:

- da se radi isključivo o ortačkom ugovoru, gdje se radnici zajednički plaćaju za zajednički izveden posao, odnosno da je predmetni Ugovor o zajedničkom upravljanju nastao isključivo zbog finansijske situacije, kako bi izgradili kablovsku mrežu 40,0% jeftinije nego što bi to bila bez ortačkog ugovora;
- da nije postojala namjera da se dijeli tržište i da su krajnji korisnici dobili pravedan udio koristi koja im pripada, kroz postignutu nisku cijenu pretplate (najniže u Bosni i Hercegovini), što je u potpunosti u skladu s članom 4. stav (3) Zakona;
- da je predmetni (ortčki) ugovor sklopljen i dogovoren samo za kablovsku distribuciju analogne programske šeme, a nije dogovoreno da se u istoj mreži radi internet i digitalna programska šema, koju je moguće distribuirati od više operatera u istoj mreži;
- da je s tehničkog aspekta nemoguće u istu mrežu uključiti dvije analogne šeme, što znači da bi i bez zaključenog predmetnog ugovora postojao samo jedan operater, a ne dva koja bi međusobno konkurisala;
- da predmetni Ugovor o zajedničkom upravljanju nije ništa promijenio u pogledu konkurencije na tržištu, samo je donio ekonomsku uštedu partnerima u izgradnji kablovske mreže;
- da je podjela pretplatničke naplate uspostavljena po principu par-nepar iz razloga izbjegavanja duplog oporezivanja porezom na promet oba potpisnika predmetnog ugovora.

Punomoćnik privrednog subjekta ELTA-MT je, podneskom broj: 02-26-6-018-20-II/11 dana 08.03.2012. godine, dostavio Zahtjev za uvid u spis predmeta, te zatražio kopiju dokumenata istoga, što mu je u skladu s članom 37. st. (2) i (3) Zakona, omogućeno dana 08.03.2012. godine u prostorijama Konkurencijskog vijeća, u prisustvu službenog lica zaduženog za vođenje predmetnog postupka.

Konkurencijsko vijeće je u daljem toku postupka od privrednog subjekata ELTA-MT i privrednog subjekta BHB Cable zatražilo dodatnu dokumentacije, aktom broj: 02-26-6-018-27-II/11 i broj: 02-26-6-018-28-II/11 od dana 03.04.2012. godine, koji su u ostavljenom roku dostavili, podnescima broj: 02-26-6-018-37-II/11 i broj: 02-26-6-018-38-II/11 od dana 16.04.2012. godine.

Privredni subjekat ELTA-MT je dana 22. 02.2012 godine, podneskom broj: 02-26-6-018-16-II/11, zatražio izuzeće i pokretanje odgovornosti predsjednika Konkurencijskog vijeća, Ibrice Lakišića zbog pokretanja postupka pred Konkurencijskim vijećem. Predmetni zahtjev je, u skladu sa odredbama člana 38. stav (3) Zakona o upravnom postupku koji propisuje da o zahtjevu za izuzeće rukovodioca institucije odlučuje Savjet ministara BiH, proslijeđen na odlučivanje Savjetu ministara BiH. Nakon toga, privredni subjekat ELTA-MT, je povukao zahtjev za izuzećem predsjednika Konkurencijskog vijeća, a zatražio izuzeće člana Konkurencijskog vijeća, Stjepa Pranjica, podneskom broj: 02-26-6-018-46-II/11 dana 24.05.2012. godine. U skladu sa propisanom procedurom Konkurencijsko vijeće na 38. sjednici održanoj dana 14.06.2012. godine je donijelo Zaključak o odbijanju zahtjeva za izuzećem, broj: 02-26-6-018-53-II/11, koji je dostavljan strankama u postupku aktom broj: 02-26-6-018-54-II/11.

Budući da se radi o predmetu sa stranama sa suprotnim interesima Konkurencijsko vijeće, u skladu s članom 39. Zakona, je zakazalo usmenu raspravu koja je održana dana 30.05.2012. godine u sjedištu Konkurencijskog vijeća i istoj su prisustvovali zakonski zastupnici i punomoćenici stranaka u postupku.

Tokom usmene rasprave sve stranke su se izjasnile da ostaju kod svojih dosadašnjih iskaza (Zapisnik broj: 02-26-6-018-48-II/11).

Zastupnik privrednog subjekata ELTA-MT, advokat Mirza Telalović je dostavio, u smislu člana 105. Zakona o upravnom postupku, troškove advokatskih usluga u ukupnom iznosu od 8.586,50 KM, podneskom broj: 02-26-6-018-50-II/11 dana 05.06.2012. godine.

4. Prikupljanje podataka od trećih lica

U svrhu prikupljanja dodatnih informacija o predmetu postupka, Konkurencijsko vijeće je zahtjev za dokumentacijom uputilo RAK-u (o broju kablovskih distributera na relevantnom tržištu, izdatim dozvolama za distribuciju kablovske televizije, broja pretplatnika itd), koji je u ostavljenom roku dostavio tražene podatke, podneskom broj: 02-26-2-018-21-II/11 od dana 14.03.2012. godine.

Konkurencijsko vijeće je takođe u cilju utvrđivanja broja distributera televizijskog programa koji djeluju na relevantnom tržištu grada Lukavaca je uputilo zahtjev za dostavljanje podataka od 11 (od ukupno 16) kablovskih operatera, koji posjeduju dozvolu za mrežnog operatera izdatu od strane RAK-a, i mogu pružati usluge, između ostalog, i na područje grada Lukavca.

Konkurencijsko vijeće se dopisom, broj: 02-26-6-018-30-II/11 od dana 03.04.2012. godine, obratilo i to: privrednom subjektu T3 d.o.o. Ilidža; privrednom subjektu Logosoft d.o.o. Sarajevo; privrednom subjektu M&H Company d.o.o. Sarajevo; privrednom subjektu Softnet d.o.o. Sarajevo; privrednom subjektu Elta Kabel d.o.o. Doboj; privrednom subjektu Artnet d.o.o. Kiseljak; privrednom subjektu Air Aba d.o.o. Sarajevo; privrednom subjektu Aneks d.o.o. Banja Luka; privrednom subjektu Telemach d.o.o. Sarajevo; privrednom subjektu Ak online d.o.o. Sarajevo; privrednom subjektu Dasto Semtel d.o.o. Bijeljina. Svi odgovori navedenih privrednih subjekata su dostavljeni u odobrenom roku (broj: 02-26-6-018-31-II/11 od dana 09.04.2012, broj: 02-26-6-018-32-II/11 od dana 09.04.2012, broj: 02-26-6-018-33-II/11 od dana 11.04.2012. godine; broj: 02-26-6-018-35-II/11 od dana 12.04.2012. godine, broj: 02-26-6-018-36-II/11 od dana 16.04.2012. godine; broj: 02-26-6-018-39-II/11 od dana

16.04.2012. godine; broj: 02-26-6-018-40-II/11 od 16.04.2012. godine; broj: 02-26-6-018-41-II/11 od dana 17.04.2012. godine; broj: 02-26-6-018-42-II/11 od dana 17.04.2012. godine; broj: 02-26-6-018-43-II/11 od dana 20.04.2012. godine, broj: 02-26-6-018-55-II/11 od dana 21.06.2012. godine i broj: 02-26-6-018-56-II/11 od dana 21.06.2012. godine).

5. Relevantno tržište

U skladu sa članom 3. stav (1) Zakona i čl. 4. i 5. Odluke o utvrđivanju relevantnog tržišta («Službeni glasnik BiH», br. 18/06 i 34/10) relevantno tržište se određuje kao tržište određenih proizvoda i/ili usluga koji su predmet obavljanja djelatnosti privrednih subjekata na određenom geografskom području.

Relevantno tržište proizvoda obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Relevantno geografsko tržište obuhvata cjelokupan ili značajan dio teritorije Bosne i Hercegovine na kojem privredni subjekti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova konkurencije na susjednim geografskim tržištima.

Relevantno tržište usluga predmetnog postupka je pružanje usluga na tržištu kablovske distribucije televizijskog programa.

Relevantno geografsko tržište predmetnog postupka je području grada Lukavac budući da privredni subjekt „BHB Cable TV“ i privredni subjekt „ELTA-MT“ imaju izgrađenu zajedničku mrežu na području grada Lukavca i da je to predmet Ugovora o zajedničkom upravljanju.

Slijedom navedenoga, relevantno tržište predmetnog postupka je tržište pružanja usluga kablovske distribucije televizijskog programa na području grada Lukavac.

5.1. Analiza relevantnog tržišta

Privredni subjekti BHB Cable i ELTA-MT su zajedno i istovremeno prisutni na relevantnom tržištu pružanja usluge kablovske distribucije RTV programa na području grada Lukavca od 2005. godine, tj. od završetka izgradnje njihove zajedničke mreže, odnosno potpisivanjem Ugovora br. 003/05 o zajedničkom upravljanju tom istom mrežom.

Broj pretplatnika kablovskih operatera na relevantnom tržištu u periodu od 2005. do 2011. godine:

Tabela 1.

R.b.	Broj pretplatnika za period 2005.-2011. godina	BHB Cable	ELTA-MT	TXTV d.o.o. Tuzla
1.	2005.	³ (..)**	(..)**	(..)**
2.	2006.	(..)**	(..)**	(..)**
3.	2007.	(..)**	(..)**	(..)**
4.	2008.	(..)**	(..)**	(..)**
5.	2009.	(..)**	(..)**	(..)**
6.	2010.	(..)**	(..)**	(..)**

³(..)** podaci predstavljaju poslovnu tajnu

7.	2011.	⁴ (..)**	(..)**	(..)**
----	-------	---------------------	--------	--------

Izvor: podaci privredni subjekti: BHB Cable, ELTA-MT i TXTV d.o.o. Tuzla

Konkurencijsko vijeće iz podataka dostavljenih od kablovskih operatera (ukupno jedanaest) je utvrđeno da privredni subjekt TXTV d.o.o. Tuzla pruža usluge na relevantnom tržištu grada Lukavac preko vlastitog analognog i digitalnog signala, koji emituje preko optičke mreže iznajmljene od privrednog subjekta BH Telecom d.d. Sarajevo.

Konkurencijsko vijeće je u postupku analiziralo, odnosno uporedilo cijene pružanja usluga kablovske televizije u nekim gradovima okruženja Lukavca u odnosu na cijene stranaka u postupku, te je utvrdilo da su cijena mjesečne pretplate na relevantnom tržištu manje od mjesečne pretplate za istu uslugu koju pružaju drugi kablovski operateri na teritoriji Bosne i Hercegovine, npr. privredni subjekt Anex d.o.o. Banja Luka - iznosi 12,00 KM (izvor: www.aneks.com), privredni subjekt Telemach d.o.o. Sarajevo - iznosi 15,00 KM (izvor: www.telemach.ba), privredni subjekt Art.Net d.o.o. Sarajevo - iznosi 15,00 KM (izvor: www.art-net.ba), privredni subjekt Elta-kabel d.o.o. Doboj - iznosi 12,90 KM (izvor: www.elta-kabel.com), privredni subjekt M&H Company d.o.o Sarajevo - iznosi 11,50 KM (izvor: www.mh-company.ba);

U cilju potpunijeg sagledavanja tržišta u širem kontekstu, Konkurencijsko vijeće je u obzir uzelo i podatke koje se odnose na broj pretplatnika u drugim mrežama osim kablovske i to: mreža BH Telecom-a, odnosno „Moja TV“, zatim bežična kablovska - MMDS mreža (Multichannel Multipoint Distribution System) privrednog subjekta Elta-kabel d.o.o. Doboj, i DTH (direct-to-home) satelitska mreža - Total TV.

Broj pretplatnika navedenih mreža za preiod od 2008. - 2011. godine (nisu uključeni podaci za ranije godine jer isti nisu djelovali na teritoriji Opštine Lukavac):

Tabela 2.

R.B.	Broj pretplatnika za period 2008.-2011. godina	Mreža BH Telecom-a	MMDS Mreža putem Elta -kabel d.o.o.	Total TV
1.	2008.	(..)**	(..)**	(..)**
2.	2009.	(..)**	(..)**	(..)**
3.	2010.	(..)**	(..)**	(..)**
4.	2011.	(..)**	(..)**	(..)**

Izvor: podaci privrednih subjekata: BH Telecom, Elta Kabel i Total TV

6. Utvrđeno činjenično stanje i ocjena dokaza

Nakon sagledavanja svih mjerodavnih činjenica i dokaza, kako stranaka u postupku, tako i drugih relevantnih privrednih subjekata, Konkurencijsko vijeće je utvrdilo:

- da je dana 10.02.2003. godine između privrednog subjekta „Telefonkomerc Tuzla“ d.o.o. Krečanska 15, 75000 Tuzla (dalje u tekstu: Telefonkomerc) i ELTA-MT, potpisan Ugovor o zajedničkoj izgradnji glavne stanice i mreže kablovske televizije Lukavac (općina Lukavac donijela rješenje o urbanističkoj saglasnosti broj: 02/6-03/1-23-2-986/03 od dana 14.07.2003. godine i donijela rješenje o građevinskoj dozvoli broj: 02/6-03/2-23-1-922/03 od dana 24.10.2003. godine, kojim je odobrila privrednom subjektu Telefonkomerc i privrednom subjektu ELTA-MT, da kao investitori mogu zajednički izgraditi podzemnu kablovsku televizijsku mreže na području grada Lukavca;

⁴(..)** podaci predstavljaju poslovnu tajnu

- da je privredni subjekt BHB Cable na osnovu ugovora sa privrednim subjektom Telefonkomerc od dana 15.12.2004. godine, stekao pravo vlasništva na 50,0% kablovske televizijske mreže u gradu Lukavcu, a da je privredni subjekt ELTA-MT ostao vlasnik drugih 50,0%;
- da su dana 14.09.2005. godine privredni subjekt BHB Cable i privredni subjekt ELTA-MT potpisali Ugovor o zajedničkom upravljanju (kao i Anexe ugovora broj: 01/07 od dana 08.06.2007. godine i broj: 02/07 od dana 01.02.2007. godine);
- da je dana 24.02.2007. godine, promjenjen investitor u građevinskoj dozvoli broj: 02/6-03/1-23-2-3602/04, te je privredni subjekt BHB Cable postao investitor umjesto privrednog subjekta Telefonkomerca uz suglasnost privrednog subjekta ELTA-MT-a;
- da je Općina Lukavac dana 29.10.2007. godine donijela Rješenje broj: 05/1-23-3-1667/06 o odobrenju upotrebe kablovske televizijske mreže na području grada Lukavca i postavljene glavne stanice sa antenskim sistemom investitorima, za privredni subjekt BHB Cable i privredni subjekt ELTA-MT;
- da privredni subjekt BHB Cable i privredni subjekt ELTA-MT, koristeći navedenu zajednički izgrađenu mrežu pružaju uslugu kablovske distribucije televizijskog programa u gradu Lukavcu putem jedne zajedničke analogne programske šeme (nemoguće uključiti dvije analogne šeme), mogu ponuditi samo jednu uslugu, odnosno isti paket programa što su strane u postupku i potvrdile na usmenoj raspravi održanoj dana 30.05.2012. godine;
- da krajnji korisnik dobije istu programsku šemu, bez obzira da li je pretplatnik privrednog subjekta BHB Cable ili privrednog subjekta ELTA-MT te da iz tog razloga navedeni privredni subjekti nisu stvarni konkurenti jer koristeći zajedničku infrastrukturu nude jedan proizvod na tržištu te za krajnjeg potrošača ne postoji nikakva prednost jednog privrednog subjekta u odnosu na drugog;
- da ukupno 16 kablovskih operatera sa opštom dozvolom za mrežnog operatera RAK-a mogu pružati usluge kablovske distribucije radio/televizijskog programa na području grada Lukavca, ali da samo privredni subjekt TXTV d.o.o. Tuzla pruža usluge na relevantnom tržištu (posjeduje vlastiti analogni i digitalni signal, koji emituje preko optičke mreže iznajmljene od privrednog subjekta BH Telecom d.d. Sarajevo);
- da niti jedan privredni subjekat (od 11 koji su dostavili svoje odgovore) nije naveo postojanje bilo kakve pravne i administrativne barijere za eventualni ulazak na relevantno tržište grada Lukavac, nego su kao razloge naveli poslovnu politiku i neposjedovanje potrebne infrastrukture i slično;
- da se u predmetnom Ugovoru o zajedničkom upravljanju sklopljenom između privrednog subjekta BHB Cable i privrednog subjekta ELTA-MT, radi o ortačkom ugovoru kojim je regulisana upotreba mreže u zajedničkom vlasništvu;
- da je Ugovorom o zajedničkom upravljanju, koji je predmet ocjene u postupku pred Konkurencijskim vijećem, regulisana samo kablovska distribucija programa dok distribucija ostale dvije usluge (telefonija i Internet) nije uključena, jer se za te dvije usluge ista mreža može koristiti za distribuciju dva signala.

Iz navedenog proizilazi da sklapanje predmetnog Ugovora o zajedničkom upravljanju predstavlja zajedničku poslovnu politiku. Predmetni ugovor je vrsta ortačkog ugovora kojim je regulisano zajedničko vlasništvo i upotreba mreže s namjerom ravnopravnog upravljanja mrežom i pružanjem usluga. S tim u vezi potpisnici istoga ne predstavljaju stvarne konkurente na relevantnom tržištu, jer nude jednu uslugu potrošačima /pretplatnicima.

Konkurencijsko vijeće je utvrdilo da privredni subjekt BHB Cable i privredni subjekt ELTA-MT na relevantnom tržištu imaju dominantan položaj, ali da taj dominantan položaj nije rezultirao nerealno visokom cijenom usluga, jer je analizom cijena drugih kablovskih operatera u gradovima okruženja utvrđeno da je cijena na relevantnom tržištu grada Lukavca manja nego u drugim dijelovima Bosne i Hercegovine.

Također, Konkurencijsko vijeće je utvrdilo da na relevantnom tržišta nije isključena konkurencija, odnosno da ne postoji nikakva barijera za djelovanje drugih mrežnih operatera, koji posjeduju odgovarajuću dozvolu izdatu od RAK-a.

Imajući u vidu gore navedeno, Konkurencijsko vijeće je utvrdilo da se Ugovor o zajedničkom upravljanju ne smatra zabranjenim sporazumom, budući da se ne sadrži odredbe o podjeli tržišta ili izvora snabdjevanja između privrednog subjekta BHB Cable i privrednog subjekta ELTA-MT iz člana 4 stav (1) tačka b) Zakona, koje za cilj i posljedicu ima sprečavanje, ograničavanje ili narušavanja tržišne konkurencije.

Konkurencijsko vijeće je Odluku kojom je privredni subjekt BHB Cable, uslovno oslobođen kazne za povredu člana 4. stav (1) Zakona stavilo van snage, budući da Konkurencijsko vijeće u provedenom postupku nije utvrdilo postojanje zabranjenog sporazuma.

Konkurencijsko vijeće o Zahtjevu za nadoknadu troškova zastupanja privrednog subjekta ELTA-MT, će donijeti poseban zaključak, u skladu sa članom 108. stav (4) Zakona o upravnom postupku.

Slijedom navedenog, Konkurencijsko vijeće je odlučilo kao u tačkama 1. 2. i 3. dispozitiva ovog Rješenja.

7. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

Ibrica Lakišić